

तीमथियुस नै दूजौ कागद

1 पौलुस कांनी सूँ जकौ परमेसर री इच्छा सूँ यीशु मसीह रौ प्रेरित है अर जिणनै यीशु मसीह मांय जीवण पावण री आखड़ी रौ प्रचार करण सारू भेजीज्यौ है:

2 व्हालै पूत तीमथियुस रे नांव।

परम पिता परमेसर अर म्हारै प्रभु यीशु कांनी सूँ थनै करुणा, किरपा अर सांति मिळै।

धिनवाद अर हंसबधावौ

3 रात-दिन म्हारी प्रार्थनावां में लगोलग थारी चितार करता थकां, म्हैं उण परमेसर नै धिनवाद देऊं हूं अर उणरी सेवा म्हारै बडेरां री रीत मुजब साफ हियै सूँ करू हूं। **4** म्हारै सारू थूं जका आंसू बैवाया हा, उणने चेतै कर'र म्हैं थासूं मिळण सारू उमायौ हूं, ताकि आणंद सूँ भर जाऊं। **5** थनै थारौ वौ साचौ विस्वास ई चेतै है जकौ पैलां थारी नानी लोईस अर थारी मां यूनिके मांय हौ। म्हनै भरोसौ है के वौ इज विस्वास थारै मांय ई है। **6** इण वास्तै म्हैं थनै याद दिराऊं हूं के परमेसर रे वरदान री उण जोत नै जगायां राख जकी थनै तद मिळी ही जद थारै माथै म्हैं म्हारौ हाथ राख्यौ हौ। **7** क्यूँके परमेसर आपां नै जकी आतमा दी है, वा आपां नै कायर नीं बणावै बल्के आपां नै प्रेम, संजम अर सगती सूँ भर देवै।

8 इण वास्तै थूं म्हारै प्रभु के म्हारी, जकौ उण सारू ई बंदी बण्योड़ी है, साख भरण में लाज मत कर। बल्के थनै परमेसर जकी सगती दी है, उणसूं सुभसंदेस सारू जातनावां झेलण मांय म्हारौ सागौ दै।

9 वौ इज म्हारी रिच्छा करी है अर पवित्र जीवण सारू म्हानै बुलाया है—म्हारै कर्योड़ा करमां रे आधार माथै नीं, बल्के उणरे आपरै उण धेय अर किरपा मुजब जकौ परमेसर कांनी सूँ यीशु मसीह मांय म्हानै पैलां ई आदूकाळ सूँ संप दिरीज्यौ है। **10** पण अबै आपां रे कल्याणकर्ता यीशु मसीह रे प्रगट होवण रे सागै-सागै आपां रे सारू उजासित करीज्यौ है। वौ प्रित्यु रौ अंत कर दियौ अर जीवण अर अमरता नै सुभसंदेस रे मारफत उजासित कर दियौ है।

11 इणी सुभसंदेस नै पसारण सारू म्हनै अेक प्रचारक, प्रेरित अर शिक्षकरै रूप में लगाईज्यौ है। **12** अर औ इज कारण है जिणसूं म्हैं आं बातां री दुख उठाय रेयौ हूं। अर फेरू ई लजखाणौ नीं हूं क्यूँके जिण माथै म्हैं विस्वास कर्यौ है, म्हैं उणनै जानूं हूं अर म्हैं औ मानूं हूं के वौ म्हनै जकौ संप्यौ है, वौ उणरी रिच्छा करण मांय सिमरथ है, जद तांई वौ दिन^a आवै,

13 उण सिरै सीख नै जकी थूं म्हासूं यीशु मसीह में मिळण वाळै विस्वास अर प्रेम रे सागै सुणी है, थूं जकौ कीं सिखावै उणरौ आदर्श वा इज सिरै सीख है। **14** आपां रे मांय रेवास करण वाळी पवित्र आतमा रे मारफत थूं उण अमोलक धरोड़ री रुखाळी कर जकी थनै संपीजी है।

15 जियां के थूं जाणै इज है के वै सगळा जका अेशिया में रेवै है, म्हनै छोडग्या है। फुगिलुस अर हिरमुगिनेस वां मांय सूँ इज है। **16** उनेसिफिरुस रे परिवार माथै प्रभु किरपा करै। क्यूँके वौ केई मौकां माथै म्हनै सुख पूगायौ है। अर वौ म्हारै जेळ में रेवण सूँ लजखाणौ नीं पडियौ। **17** बल्के वौ तौ जद रोम आयौ हौ, जद तांई म्हासूं मिळ नीं सक्यौ, म्हनै लाग राख'र सोधतौ रेयौ। **18** प्रभु करै उणनै उण दिन प्रभु कांनी सूँ दया मिळै, वौ इफिसुस मांय म्हारी भांत-भांत सूँ जकी सेवा करी है थूं वानै आछी तरे जाणै है।

मसीह यीशु रौ साचौ सिपाई

2 जटै तांई थारी बात है, म्हारा पूत! यीशु मसीह मांय मिळण वाळी किरपा सूँ सबळ बणजा। **2** मोकळा लोगां री साखी मांय म्हासूं थूं जकौ कीं सुण्यौ है, उणनै वां विस्वास करण जोगा लोगां नै संप दै जका के दूजां नै ई उणरी सीख देवण में सिमरथ होवै। **3** जातनावां झेलण मांय मसीह यीशु रे अेक आछै सिपाई री भांत म्हारै सागै आय रळ। **4** अैड़ी

^a **1:12** वौ दिन मतळब वौ दिन जद सगळा लोगां रौ न्याय करण सारू यीशु मसीह आवैला अर वानै आपरै सागै रेवण सारू लेय जावैला।

कोई भी, जकौ सैनिक री भांत सेवा कर रैयौ है, अपणै आपनै साधारण जीवन रै जंजाळ में नीं फंसावै, क्यूंके वौ आपरै सासक अधिकारी नै राजी करण सारू लाय्योड़ी रैवै।⁵ अर इयां इज जे कोई किणी दौड़ री होड में हिस्सौ लेवै, तौ उणनै जीत रौ सेवरौ तद ताईं नीं मिळै, जद ताईं वौ नेमां रौ पाळण करता थकां उण होड मांय हिस्सौ नीं लेवै।⁶ मैणती कामगरौ किरसाण इज उपज रौ पैलौ भाग हासल करण रौ अधिकारी है।⁷ म्हें जकौ बताऊं हूं, उण माथै विचार कर। प्रभु थनै सगळौ कीं समझण री खिमता देवैला।

⁸यीशु मसीह रौ ध्यान करता रैवौ, जकौ मर्योडां मांय संपू पाछौ जी उठ्यौ है अर जकौ दाऊद रौ वंसज है। औ इज उण सुभसंदेस रौ सार है जिणरौ म्हें उपदेस देऊं हूं ⁹इण वास्तै इज म्हें जातनावां झेलूं हूं। अठै लग के अंक अपराधी री भांत म्हनै सांकळां सूं बांधीज्यौ है। पण परमेसर रौ वचन तौ बंधणी में नीं आवै।¹⁰ इण वास्तै ई परमेसर रै टाळ्योडे लोगां सारू म्हें हरेक दुख उठावतौ रैऊं ताकि वै ई मसीह यीशु में मिळण वाळै कल्याण नै अणंत महिमा रै सागै हासल कर सकै।

¹¹औ वचन विस्वास जोग है कै:

जे म्हे उणरै सागै मर्यां हां,

तौ उणरै सागै इज जीवांला,

¹²जे दुख झेल्या है तौ उणरै सागै राज ई करांला।

जे म्हे उणनै छोडांला, तौ वौ ई म्हानै छोड देवैला,

¹³म्हे चायै विस्वासहीण होवां पण वौ हमेसा सारू विस्वासजोग रैवैला

क्यूंके वौ आपरौ इनकार नीं कर सकै।

तै कर्योडा कार्यकर्ता

¹⁴लोगां नै आं बातां रौ ध्यान दिरावता रैवौ अर परमेसर री साख में वांनै सावचेत करता रैवौ कै वै सबदां नै लेय'र झौड़-झिकाळ नीं करै। अँडा लड़ाई झगड़ा सूं कोई लाभ कोनी, बल्कै आंनै जका सुणै, वै ई नस्ट व्हे जावै।¹⁵ अपणै आपनै परमेसर रै अंगेजण जोग बणा'र अंक अँडै सेवकरै रूप में हाजर करण रौ जतन करता रैवौ जिणसूं किणी बात सारू लजखाणौ पड़ण री नौबत नीं आवै। अर जकौ परमेसर रै साच-वचन नै सावळसर बरततौ होवै,

¹⁶अर सांसारिक वाद-विवादां अर बिरथा बातां सूं बच्चोड़ी रैवै। क्यूंके अँ बातां लोगां नै परमेसर सूं आंतरे ले जावै।¹⁷ अँडा लोगां री सीख राधरै रूप में पसरैला। हुमिनयुस अर फिलेतुस अँडा इज है,¹⁸ जका साच रै बिन्दु सूं भटक्या है। वारौ कैवणौ है कै पाछौ उत्थान तौ अबार ताईं व्हे चुक्यौ है। अँ कीं लोगां रै विस्वास नै खतम कर रैया है।

¹⁹कीं ई होवौ, परमेसर जकी मजबूत नींव राखी है, वा मजबूती सूं इज खड़ी है। उण माथै मंड्योड़ी है, “प्रभु आपरै भगतां नै जाणै।”^a अर “वौ हरेक, जकौ कैवै कै प्रभु रौ है, उणनै माड़ी बातां अर माडै कामां सूं बचणौ चाईजै।”

²⁰अंक बडै घर मांय खाली सोने-चांदी रा इज बरतण कोनी होवै, उण मांय काठ अर माटी रा भांडा ई होवै है। कीं खास उपयोग सारू होवै अर कीं साधारण उपयोग सारू।²¹ इण वास्तै जे मिनख अपणै आपनै बुरायां सूं सुद्ध कर लेवै तौ वौ खास उपयोग रौ बणैला अर पछै पवित्र बण'र आपरै मालक सारू उपयोगी सिद्ध होवैला। अर हरेक आछै काम सूं त्यार रैवैला।

²²जवानी री भूंडी चावना सूं दूर रैवौ। धारमिक जीवन, विस्वास, प्रेम अर सांति सारू वां सगळां सागै जका सुद्ध मन सूं प्रभु रौ नांव जपै, जुट्योडा रैवौ।²³ मूरखताई रा बाधू तरक-वितरकां सूं हमेस बचता रैवौ। क्यूंके थे जाणौ इज हौ कै आं सूं झौड़-झिकाळ जलमै।²⁴ अर प्रभु रै सेवक नै तौ झौड़-झिकाळ करणौ ई नीं चाईजै। उणनै तौ सगळां माथै दया राखणी चाईजै। उणनै सीख देवण में जोगौ होवणौ चाईजै। उणनै ठीमर होवणौ चाईजै।²⁵ उणनै तौ आपरै विरोधियां नै ई नरमाई सूं समझावणौ चाईजै कै परमेसर वांनै मन बदळण री सगती देवैला। ताकि वांनै ई साच रौ ग्यान व्हे सकै।²⁶ अर वै सावचेत होय'र सैतान रै उण फंदे सूं बच जावै जिणमें सैतान वांनै फंसाय राख्या है। ताकि वै परमेसर री इच्छा लारै चाल सकै।

आखरी दिनां मांय

3¹चेतै राखौ, आखरी दिनां मांय आपां सारू बौत माड़ी बगत आवैला।² लोग स्वारथी,

लालची, गरबाळू, बोळरडा, परमेसर रा निंदक, माईतां री परवा नीं करणिया, हियाफूट, अपवित्र 3प्रेमविहूण, खिम्याहीण, निंदक, असंजमी, बर्बर, जकौ कीं आछौ है उणरा विरोधी, 4विस्वासघाती, विवेकहीण, घमंडी अर परमेसर-प्रेमी होवण री बजाय सुखवादी व्हे जावैला। 5वै धरम रा दिखावटी रूप री पाळणा तौ करैला पण उणरी मांयली सगती नै नकार देवैला। वां सूं हमेस अळघा रैवौ।

6क्यूकें आं सूं कीं अँडा है जका घरां मांय घुसपैठ कर'र पापी, निबळी इंडा-सगती री पापवाळी हरेक तैरै री इंडावां सूं चंचळ लुगायां नै वस में कर लेवै है। 7अँ लुगायां सीखण रौ जतन तौ हमेस करती रैवै, पण साच रै समूचे ग्यान तांई वै कदैई नीं पूग सकै। 8यन्नेस अर यम्नेस जियां मूसा रौ विरोध कर्यौ हौ, बियां ई अँ लोग साच रा धुर विरोधी है। आं लोगां री बुद्धि भिस्ट होयगी है अर विस्वास रै लारै चालण मांय अँ लोग असफळ है। 9पण अँ अबै बेसी आगै नीं बध सकैला, क्यूकें जियां यन्नेस अर यम्नेस री मूरखाई चौडै आयगी ही, बियां ई आंरी मूरखता ई सगळां रै सांम्ही उजागर व्हे जावैला।

छेहलौ आदेस

10कीं होवौ, थूं म्हारी सीख री पाळणा करी है। म्हारी जीवणगत, म्हारै जीवण रौ धेय, म्हारै विस्वास, म्हारी ठीमरता, म्हारै प्रेम, म्हारै धीरप 11म्हारी वां जातनावां अर पीड मांय म्हारी सागौ दियो है। थूं तौ जाणै इज है कै अंताकिया, इकुनियुम अर लुसा मांय म्हनै किती करडी जातनावां दिरीजी ही, जिणां नै ई म्हें सैवी ही। पण प्रभु वां सूं म्हारी रिखपाळ करी। 12साच्याणी, परमेसर री सेवा मांय जकी नेकी रै सागै जीवणा चावै है, सताया ई जावैला। 13पण पापी अर ठग दूजां नै ठगता थकां खुद ई ठगीजता अर माडै सूं माडा होवता जासी।

14पण थे जकी बातां नै सीखी अर मानी है, वांनै करता जावौ। थूं जाणै इज है कै वां बातां नै थूं किणसूं सीखी है। 15अर थनै ठाह है कै थूं बाळपणै सूं ई पवित्र शास्त्रां नै ई जाणै है। वै थनै वो विवेक देय सकै है जिणसूं मसीह यीशु में विस्वास रै मारफत मुगती मिळ सकै है। 16सगळौ पवित्र शास्त्र परमेसर री प्रेरणा सूं रचीज्यौ है। औ लोगां नै साच री सीख देवण, वांनै

सुधारण, वांनै वांरी बुरायां दरसावण अर धारमिक जीवण री सीखामणी मांय उपयोगी है। 17इणसूं परमेसर रौ हरेक सेवक शास्त्रां री बरतारी करतौ थकौ हर तैरै रा आछा करमां नै करण सारू सिमरथ अर खिमतावान बणैला।

4 1परमेसर री साख में अर मसीह यीशु नै आपरौ साखीधर बणाय'र, जकौ सगळा जीवता अर जका मरया है, वांरी न्याय करणियौ है, अर क्यूकें उणरौ पाछौ आवणौ अर उणरौ राज साव नैडौ है, म्हें थनै आखडी दिराय'र आदेस देऊं हूं: 2सुभसंदेस रौ प्रचार कर। चायै थनै सुविधा होवै कै दुविधा, थारौ कर्तव्य पूरौ करण नै त्यार रै। लोगां नै कांई करणौ चाईजै, वांनै समझा। जद वै कांई माडौ काम करै, वांनै सावचेत कर। लोगां नै धीरज सागै समझाय'र वांरी हूंस बधाव।

3म्हें औ इण वास्तै बताय रैयौ हूं कै अेक बगत अँडौ आवैला जद लोग आछे उपदेस नै सुणणौ तक नीं चावैला। वै आपरी इंडावां मुजब आपरै सारू मोकळा गुरु अेकठ कर लेवैला। अँडा गुरु वो इज सुणावैला जकौ वै सुणणौ चावै। 4वै आपरै कानां नै साच सूं मोड देवैला अर गोडै घड्योडी कथावां माथै ध्यान देवण लाग जावैला। 5पण थूं पक्कौ रैय'र हरेक गतागम में थारै माथै आंकस राख। जातनावां झेल अर सुभसंदेस रै प्रचार रौ काम कर। जकी सेवा थनै संपीजी है, उणनै पूरी कर।

6जटै तांई म्हारी बात है, म्हें तौ अबै अरघ रै उनमान ठोळीजण वाळौ हूं। अर म्हारौ तौ जीवण सूं विदा लेवण रौ समै ई आय पूय्यौ है। 7म्हें सांतरी होड में लाग्योडौ रैयौ हूं। म्हें म्हारी दौड दौडली। म्हें विस्वास रै पंथ री रिखपाळ करी है। 8अबै जीत रौ मुगट म्हारी उडीक मांय है। जकौ धारमिक जीवण सारू म्हनै मिळण वाळौ है। उण दिन न्याय करणियौ प्रभु म्हनै जीत रौ मुगट पेरौवैला। नीं फगत म्हनै, बल्के वां सगळां नै जका प्रेम रै सागै उणरै प्रगत होवण री बात जोय रैया है।

निजु संदेस

9जितौ जल्दी व्हे सकै, म्हासूं मिळण सारू आवण रौ उपाव करजै। 10क्यूकें इण जगत रै मोह में पज'र देमास म्हनै छोड दियो है अर वो थिस्सलुनीके गियो

परौ। क्रेस कैंस गलातिया अर तीतुस दलमतिया गियौ परौ। **11**खाली लूकौ इज म्हारै कनै है। मरकुस रै कनै जाईजै अर जद थूं आवै तद उणनै सागै लेय आईजै क्यूंके म्हारै काम मांय वौ म्हारौ सैयोगी होय सकै है। **12**तिखिकुस नै म्हें इफिसुस भेजूं हूं।

13जद थूं आवै, तौ उण कोट नै लेवतौ आईजै, जकौ म्हें त्रोआस रै घरां छोड दियौ हौ। म्हारी पोथ्यां, खास कर'र चरम-पत्रां नै ई लेय आईजै।

14ताम्रकार सिक्ंदर म्हनै अणूती हाण पूगाई है। वौ जैडौ कर्यौ है, प्रभु उणनै वैडौ इज फळ देवैला। **15**थूं ई उणसूं सावचेत रैईजै क्यूंके वौ आपां रै उपदेस रौ घोर विरोध करतौ रैयौ है।

16सरुआत मांय जद म्हें म्हारौ बचाव सांम्ही राखण लाग्यौ तौ म्हारै पख में कोई कोनी आयौ। बल्कै वां तौ म्हनै अकलौ छोड छिटकायौ। परमेसर करै वांनै उणरौ हिसाब नीं देवणौ पड़े। **17**म्हारै पख में तौ प्रभु ऊभा

होय'र म्हनै सगती दी। ताकि म्हारै मारफत सुभसंदेस रौ भरपूर प्रचार व्हे सकै। जिणनै सगळा यहूदी सुण सकै। सिंघ रै मूंडे सूं म्हनै बचाईजग्यौ है। **18**किणी पण पापवाळै हमलै सूं प्रभु म्हनै बचावैला अर आपरै सुरग वाळै राज में बिना किणी बाधा रै लेय जावैला। उणरी महिमा हमेसा बणी रैवै। आमीन!

कागद रौ निवेडौ

19प्रिसकिल्ला, अक्विला अर उनेसिफुरुस रै परिवार नै नमस्कार कैईजै। **20**इरास्तुस कुरिन्थुस में ठैरग्यौ है। म्हें त्रुफिमुस नै उणरी मांदगी रै कारण मिलेतुस में छोड दियौ है। **21**सियाळै सूं पैलां आवण रौ जतन करजै।

यूबुलुस, पूदेंस, लिनस अर क्लौदिया अर ओरूं ई सगळा भायां रौ थनै नमस्कार।

22प्रभु थारै सागैरैवै। थां सगळां माथै प्रभु री किरपा रैवै।